



Rafaël Cativei al à cjolte Miane di Piso. Lui al saveve lei e scrivi pulît. Invezit jê e faseve fature, ma par chel cont no voleve jessi di mancul.

Chest fat, zontât cuntun dedut di gjelosit, le puartave a cori jê sul puartel dal curtîl a spietâ la puestine, a vierzi par ordin la pueste ancje a non di Rafaël e, za che e jere vierte, a lei biel planc ce che i scrivevin.

Ma par solit e rivave pueste de prime fie Dusuline, a servî a Turin di frutate tune cjase di siôrs che i volevin ben come a une fie.

Dusuline e jere a stâ cui siôrs, no veve spesis di sorte (al plui, cualchi cine la fieste dopomisdì, che e à tant vaiût cu lis storiis di Robert Taylor e di Shirley Temple, e tant ridût cun Cric e Croc), la mesade je mandavin cjase par ordin i siôrs tante che e jere e cun di plui, une volte, Dusuline e à zontât i doi francs di une mance vuadagnade, une dì, di une tant degnevule persone amie dai siôrs.

“Vi mando anche una mancia, che so che avete tanto bisogno” ur à scrit Dusuline, e sô mari Miane e leieve cumò e tornave a lei, cui voi sledrosâts di no podê crodi.

“Cje ca, Rafaël, ce robones! Dusuline a dîs che nus mande une manze” e cor tal ort a visâ Rafaël che al nase la robe a colp, cence bisugne di lei.

“Orpo di chê madone, Miane, sâtu che a Turin e à manzes par ogni cjanton!”

“E par dute chê strade, cemût ae di fâ, puare bestie?”

“Ah bon, baste dîi alon e jê e sa dibessole vignî di Turin a Sante Marie.”

“Sêtu sigûr?”

“Po no ûtu! A sarà cumò za rivade a mieze strade.”

E jù strambolots di chê sorte, su la puarte dal ort, fin che Rafaël i à dit dai doi francs e i à dit

che sai tegni par se, di cjosi alc, in maniere un fregul di indulcîle e no sintî il verbumcaro par dute chê solfe che i veve fat.

di Ivano Urli

#202